



Broj: 03-1-37-2-888-2/13 RK  
Datum: 29.10.2013. godine

PRIMLJENO: 01-11-2013			
Organizaciona jedinica	Klasifikaciona oznaka	Rec br.	Broj prijava
12	50	3634-2	

**VISOKO SUDSKO I TUŽILAČKO VIJEĆE  
BOSNE I HERCEGOVINE**  
Ul. Kraljice Jelene br. 88

COPY - K A

01,02

**PREDMET: Mogućnost dobivanja podataka o dužniku u svrhu utvrđivanja njegove imovine sa ciljem efikasnog provođenja izvršnog postupka, mišljenje - dostavlja se,**

**VEZA: Vaš akt broj: 12-50-3634-1/2013 od 30.09.2013. godine**

Agencija za zaštitu ličnih podataka u Bosni i Hercegovini (u daljem tekstu: Agencija) zaprimila je vaš upit broj i datum Veze, u kome tražite mišljenje o mogućnosti dobivanja podataka o dužniku u svrhu utvrđivanja njegove imovine sa ciljem efikasnog provođenja izvršnog postupka. Ukazali ste i na stav Evropske komisije za efikasnost pravosuđa (CEPEJ) koja je usvojila „Smjernice za bolju provedbu postojećih preporuka Vijeća Evrope o izvršnom postupku“ (u daljem tekstu: Smjernice).

U vezi Vašeg akta, dajemo Vam sljedeće:

### M I Š L J E N J E

U skladu sa članom 3. alineja 1. Zakona o zaštiti ličnih podataka u Bosni i Hercegovini (“Sl. glasnik BiH broj: 49/06, 76/11 i 89/11) (u daljem tekstu: Zakon), “ **lični podaci** znače bilo koju informaciju koja se odnosi na fizičko lice koje je identifikovano ili se može utvrditi identitet lica“ dok je prema alineji 7. propisano da je „**kontrolor** svaki javni organ, fizičko ili pravno lice, agencija ili drugi organ koji samostalno ili sa drugim vodi, obrađuje i utvrđuje svrhu i način obrade ličnih podataka na osnovu zakona ili propisa.“

Dakle, podaci koje u Upitu navodite (plata izvršenika, račun u banci i visina sredstava na istom), su lični podaci u smislu naprijed citirane odredbe Zakona, te je obaveza svakog kontrolora da ih obrađuje u skladu sa osnovnim principima obrade ličnih podataka. Jedan od principa je obrada na *zakonit i pravičan način*, kako je to propisano članom 4. tačka a) Zakona. Ovaj princip podrazumijeva obradu ličnih podataka na osnovu i u granicama zakona i drugih propisa.

Budući da se Vaš upit odnosi na primjenu odredbi važećih Zakonâ o izvršnom postupku koji se primjenjuju u Bosni i Hercegovini onda i obrada ličnih podataka na osnovu relevantnih odredbi tih zakona ima pravni osnov u smislu navedenog principa obrade.

Shodno odredbama Zakonâ o izvršnom postupku, sud će naložiti izvršeniku ili drugom licu odnosno organu ili organizaciji da dostavi podatke kojima raspolaže o imovini izvršenika, i to pod prijetnjom izricanja sankcija, odnosno novčane kazne licima, odgovornim licima u pravnom licu, organu odnosno organizaciji koji ne postupe po nalogu suda.

Zaključak suda kojim se na osnovu odredbi Zakonâ o izvršnom postupku nalaže dostavljanje podataka o izvršenikovoju imovini, predstavlja zahtjev koji je u skladu i sa članom 17. stav (2) i (3) Zakona, jer podaci se traže radi obavljanja poslova u okviru zakonom utvrđene nadležnosti i ostvarivanja zakonitih interesa te u tom slučaju isti ima jasnu, zakonom utvrđenu, svrhu i pravni osnov za korištenje ličnih podataka.

Kada se radi o pristupu podacima izvršenika od strane tražioca izvršenja, shodno odredbama Zakona potrebno je da tražilac izvršenja kao podnosilac takvog zahtjeva navede pravni osnov i svrhu traženja podataka, odnosno dokaže da su traženi podaci neophodni za zaštitu i ostvarivanje njegovih zakonitih prava i interesa.

Upravo ovakav stav je usvojen u Smjernicama i konstatovan u vašem Upitu. Dovoljnim dokazom za pristup podacima smatra se presuda ili drugi izvršni naslov.

U poglavlju II. Smjernica koje se odnosi na „Provođenje izvršenja“ te prikupljanje informacija o izvršeniku i njegovoj imovini upućuje se na primjenu državnih zakona o zaštiti ličnih podataka.

Dakle, dostavljanje relevantnih podataka u svrhu vođenja i okončanja izvršnog postupka treba se vršiti na način propisan Zakonima o izvršnom postupku te shodno obrazloženim odredbama Zakona, za koje smo mišljenja da nisu u suprotnosti sa stavovima Smjernica.

Zaključno, Agencija je mišljenja da Zakon ne predstavlja prepreku za davanje podataka o dužniku u cilju provođenja izvršnog postupka, ali obrada podataka kao i u svakom drugom postupku se treba vršiti u skladu sa principima obrade ličnih podataka tj. da postoji pravni osnov, utvrđen obim i mjera neophodnih podataka za ispunjenje određene svrhe i drugo.

S poštovanjem,

**Dostavljeno:**

- Naslovu
- Spis predmeta

